



**PRIJEDLOG VISOKOG SUDSKOG I TUŽILAČKOG VIJEĆA BOSNE I  
HERCEGOVINE ZA IZMJENE I DOPUNE  
ZAKONA O VSTV-u BOSNE I HERCEGOVINE**

**Član 4.**

Član 4. mijenja se i glasi:

**„Član 4.  
Članstvo**

(1) *Vijeće ima 20 članova.*

(2) *Osam članova Vijeća bira se iz reda sudija i to:*

- a. jedan sudija Apelacionog suda Bosne i Hercegovine ili Suda Bosne i Hercegovine, kojeg biraju sudije Apelacionog suda Bosne i Hercegovine i Suda Bosne i Hercegovine.*
- b. jedan sudija Apelacionog suda Brčko distrikta ili Osnovnog suda Brčko distrikta, kojeg biraju sudije Osnovnog i Apelacionog suda Brčko distrikta..*
- c. jedan sudija Vrhovnog suda Federacije Bosne i Hercegovine, kojeg biraju sudije Vrhovnog suda Federacije Bosne i Hercegovine.*
- d. jedan sudija kantonalnog suda iz Federacije Bosne i Hercegovine, kojeg biraju sudije kantonalnih sudova.*
- e. jedan sudija općinskog suda iz Federacije Bosne i Hercegovine, kojeg biraju sudije općinskih sudova.*
- f. jedan sudija Vrhovnog suda Republike Srpske, kojeg biraju sudije Vrhovnog suda Republike Srpske.*
- g. jedan sudija okružnog suda iz Republike Srpske ili Višeg privrednog suda, kojeg biraju sudije okružnih sudova i Višeg privrednog suda.*
- h. jedan sudija osnovnog suda ili okružnog privrednog suda iz Republike Srpske, kojeg biraju sudije osnovnih i okružnih privrednih sudova.*

(3) *Osam članova Vijeća bira se iz reda tužilaca i to:*

- a. jedan tužilac Tužilaštva Bosne i Hercegovine, kojeg biraju tužioci Tužilaštva Bosne i Hercegovine.*
- b. jedan tužilac Tužilaštva Brčko distrikta Bosne i Hercegovine, kojeg biraju tužioci Tužilaštva Brčko distrikta Bosne i Hercegovine.*
- c. jedan tužilac Federalnog tužilaštva Federacije Bosne i Hercegovine, kojeg biraju tužioci Federalnog tužilaštva Federacije Bosne i Hercegovine.*
- d. dva tužioca kantonalnih tužilaštava iz Federacije Bosne i Hercegovine, koje biraju tužioci kantonalnih tužilaštava.*
- e. jedan tužilac Republičkog tužilaštva Republike Srpske, kojeg biraju tužioci Republičkog tužilaštva Republike Srpske.*
- f. dva tužioca okružnih tužilaštava iz Republike Srpske, uključujući Posebno tužilaštvo za suzbijanje organizovanog i najtežih oblika privrednog kriminala, kojeg biraju tužioci okružnih tužilaštava, uključujući Posebno tužilaštvo za suzbijanje organizovanog i najtežih oblika privrednog kriminala.*

(4) Četiri člana Vijeća biraju se na sljedeći način:

- a. jednog člana Vijeća bira Predstavnički dom Parlamentarne skupštine Bosne i Hercegovine, dvotrećinskom većinom, na prijedlog Vijeća ministara Bosne i Hercegovine;
- b. jednog člana Vijeća bira Predstavnički dom Parlamenta Federacije Bosne i Hercegovine, dvotrećinskom većinom, na prijedlog Vlade Federacije Bosne i Hercegovine;
- c. jednog člana Vijeća bira Narodna skupština Republike Srpske, dvotrećinskom većinom, na prijedlog Vlade Republike Srpske;
- d. Jednog člana Vijeća imenuje Predsjedništvo Bosne i Hercegovine.

(5) Za člana Vijeća iz stava (4) ovog člana ne može biti imenovano lice koje obavlja pravosudnu funkciju, izvršnu funkciju na bilo kojem nivou, javno izabranu funkciju u zakonodavnom organu na bilo kojem nivou, niti advokatsku djelatnost.

(6) Iz jednog kantonalnog odnosno okružnog tužilaštva može biti izabran jedan član Vijeća.

(7) Sudije iz jednog općinskog ili osnovnog, odnosno kantonalnog ili okružnog suda mogu biti birani za člana Vijeća najviše dva puta uzastopno, nakon čega se sudije tog suda ne mogu kandidovati za izbor prije isteka četiri godine od prestanka drugog uzastopnog mandata.

(8) Za člana Vijeća iz stava 2. tačka a) ovog člana bira se naizmjenično sudija Apelacionog suda Bosne i Hercegovine i sudija Suda Bosne i Hercegovine.

(9) Za člana Vijeća iz stava 2. tačka b) ovog člana bira se naizmjenično sudija Apelacionog suda Brčko distrikta Bosne i Hercegovine i sudija Osnovnog suda Brčko distrikta Bosne i Hercegovine.

(10) Članovi Vijeća su osobe visokih moralnih kvaliteta i profesionalne nepristrasnosti, poznate po djelotvornosti, stručnosti i profesionalnoj nepristrasnosti. Članovi Vijeća izabrani od strane organa zakonodavne vlasti i Predsjedništva Bosne i Hercegovine trebaju imati stručne kvalifikacije i iskustvo koje su relevantne za rad Vijeća.

(11) Sastav Vijeća, u pravilu, odražava sastav naroda Bosne i Hercegovine i spolnu zastupljenost u Bosni i Hercegovini.

(12) Izbor članova Vijeća iz st. (2) i (3) ovog člana se provodi tajnim glasanjem putem glasačkih listića. Vijeće može uvesti elektronski sistem glasanja ukoliko su ispunjene pretpostavke u pogledu tajnosti izbora i kontrole ispravnosti izbornog procesa.

(13) U slučaju nepravilnosti u postupku izbora članova Vijeća, koje su takve vrste da utiču na rezultat izbora, Vijeće će poništiti izbor i organizovati novi postupak izbora.

(14) Postupak izbora članova Vijeća, uključujući i postupke koji su neophodni da bi se osiguralo poštivanje važećih odredbi Ustava i zakona Bosne i Hercegovine u smislu stava (11) ovog člana, s reguliše se posebnim pravilnikom kojeg donosi Vijeće.

(15) Dodatne sudije ne mogu biti birani za članove Vijeća, ali mogu učestvovati u postupku izbora članova Vijeća. Sudija i tužilac kojem je u posljednje četiri godine izrečena disciplinska mjera ne može biti izabran za člana Vijeća.

(16) *Ukoliko u kontekstu nije drugačije naznačeno, odredbe u ovom zakonu koje se odnose na sudije i tužioce tumačit će se tako da uključe sudije, tužioce, predsjednike sudova, glavne tužioce i zamjenike glavnih tužilaca.*

(17) *Članovi Vijeća su nezavisni i nepristrasni u obavljanju svojih dužnosti.“*

#### **Član 4a.**

Iza člana 4. dodaje se novi član 4a. koji glasi:

#### ***„Član 4a. Sudski i tužilački odjel***

(1) *Vijeće ima Sudski i Tužilački odjel.*

(2) *Sudski odjel ima 12 članova i čine ga članovi Vijeća izabrani u skladu sa članom 4. st (2) i (4). Predsjedavajućeg i zamjenika predsjedavajućeg Sudskog odjela biraju, iz reda sudija, članovi Sudskog odjela na period od godinu dana i mogu biti ponovo birani.*

(3) *Tužilački odjel ima 12 članova i čine ga članovi Vijeća izabrani u skladu sa članom 4. st. (3) i (4). Predsjedavajućeg i zamjenika predsjedavajućeg Tužilačkog odjela biraju iz reda tužilaca članovi Tužilačkog odjela na period od godinu dana i mogu biti ponovo birani.*

(4) *Sudski odnosno Tužilački odjel imaju nadležnosti u skladu sa članom 17a. ovog Zakona.“*

#### **Član 5.**

Član 5. Zakona mijenja se i glasi:

#### ***„Član 5. Mandat***

(1) *Članovi Vijeća imaju mandat od četiri godine i ne mogu biti ponovo izabrani na uzastopni mandat.*

(2) *Osoba može ponovo biti izabrana za člana Vijeća nakon isteka četiri godine od kraja prethodnog mandata.*

(3) *Ako članu Vijeća mandat prestane prije isteka vremena na koje je izabran, na njegovo se mjesto do isteka započetog mandata bira drugi član.*

(4) *Član Vijeća koji je izabran kao zamjena u skladu sa stavom (3) ovog člana može se kandidovati za još jedan uzastopni mandat ukoliko mu je prethodni mandat trajao kraće od 18 mjeseci.*

(5) *Članovi Vijeća izabrani iz reda sudija ili tužilaca za vrijeme trajanja mandata u Vijeću ne mogu biti birani na sudiju suda višeg nivoa odnosno tužioca tužilaštva višeg nivoa.,,*

## **Član 8.**

Član 8. Zakona mijenja se i glasi:

### **„Član 8. (Punovremeni radni angažman)**

- (1) *Predsjednik i potpredsjednici Vijeća rade u Vijeću po osnovu punovremenog radnog angažmana.*
- (2) *Vijeće može odlučiti da član Vijeća, koji je izabran u Vijeće u skladu sa članom 4. st (2) i (3), obavlja dužnosti u Vijeću po osnovu punovremenog radnog angažmana.*
- (3) *Član Vijeća koji radi u Vijeću po osnovu punovremenog radnog angažmana platu, naknade, i druga prava iz radnog odnosa ostvaruje u Vijeću u skladu sa zakonom koji reguliše plate i naknade sudija Apelacionog suda Bosne i Hercegovine i to na sljedeći način:*
  - a. *predsjednik Vijeća ostvaruje prava propisana za predsjednika Apelacionog suda Bosne i Hercegovine*
  - b. *potpredsjednik Vijeća i član Vijeća u punovremenom radnom angažmanu ostvaruju prava propisana za sudiju Apelacionog suda Bosne i Hercegovine*
- (4) *Predsjednik, potpredsjednici i članovi Vijeća u punovremenom radnom angažmanu ostvaruju pravo na naknadu troškova odvojenog života u skladu sa pravilnikom Vijeća.*
- (5) *Za vrijeme punovremenog radnog angažmana članovi Vijeća su na odsustvu sa svoje službene dužnosti.*
- (6) *Predsjedniku suda, glavnom tužiocu ili zamjeniku glavnog tužioca koji bude izabran za člana Vijeća u punovremenom radnom angažmanu prestaje mandat predsjednika suda, glavnog tužioca odnosno zamjenika glavnog tužioca preuzimanjem dužnosti u Vijeću.“*

## **Član 11.**

U članu 11. stav 3. se briše, dosadašnji stavovi (4), (5) i (6) postaju stavovi (3), (4) i (5).

Iza stava (5) dodaju se novi stavovi (6), (7), (8) i (9) koji glase:

- „(6) **Predsjednik, potpredsjednici i članovi Vijeća koji u Vijeću rade po osnovu punovremenog radnog angažmana čine Predsjedništvo kao radno tijelo Vijeća čija se nadležnost i način rada reguliše Poslovníkom.***
- (7) *Stručnu i administrativnu podršku predsjedniku Vijeća pruža Kabinet predsjednika.*
  - (8) *Šef Kabineta predsjednika za svoj rad odgovora predsjedniku Vijeća.*
  - (9) *Sekretarijat Vijeća vodi sve administrativne i finansijske poslove Kabineta predsjednika.“*

## **Član 12.**

U članu 12. stav (1) prije riječi „Vijeće“ dodaju se riječi: „Ukoliko nije drugačije propisano ovim zakonom,“

U stavu (3) riječi „stav (4)“ se mijenjaju riječima „stav (11)“.

Iza stava (4) dodaje se novi stav (5) koji glasi:

*„(5) Vijeće može, radi efikasnijeg izvršavanja određenih zadataka, formirati i druga radna tijela, koja su ovlaštena da donose odluke i izvršavaju zadatke u skladu sa Poslovníkom.“*

### **Član 13.**

Član 13. mijenja se i glasi:

#### **„Član 13. Stručnjaci**

*(1) Vijeće može angažovati sudije, tužioce, kao i druga lica koja su stručnjaci iz određene oblasti, a koji nisu članovi Vijeća, da sudjeluju u radu Vijeća, kao i komisija i drugih radnih tijela Vijeća.*

*(2) Lica angažovana u skladu sa stavom (1) ovog člana nemaju pravo glasa u rješavanju pitanja o kojim odlučuje Vijeće, osim u slučajevima predviđenim ovim zakonom.*

*(3) Stručnjaci angažovani od strane Vijeća imaju pravo na naknadu troškova i naknadu za rad, što se reguliše pravilnikom Vijeća.“*

### **Član 14.**

Član 14. mijenja se i glasi:

#### **„Član 14. Kvorum, glasanje i sastanci**

*(1) Na sjednicama Vijeća kvorum čini najmanje 13 prisutnih članova.*

*(2) Vijeće odlučuje većinom glasova svih članova, ukoliko nije drugačije propisano ovim zakonom. U pitanjima o kojima su glasovi podijeljeni, obavlja se glasanje prozivanjem članova, a glas predsjednika ili potpredsjednika u skladu sa odredbama člana 11. stav (4) je odlučujući.*

*(3) Na sjednicama Sudskog odnosno Tužilačkog odjela kvorum čini najmanje osam prisutnih članova. Predsjedavajući, a u njegovom odsustvu zamjenik predsjedavajućeg, saziva i predsjedava sjednicama Sudskog odnosno Tužilačkog odjela.*

*(4) Sudski odnosno Tužilački odjel odlučuje većinom glasova svih članova, a da bi se odluka smatrala donesenom za istu mora glasati najmanje pet članova Sudskog odnosno Tužilačkog odjela iz reda sudija odnosno iz reda tužilaca. U pitanjima o kojima su glasovi podijeljeni, obavlja se glasanje prozivanjem članova, a glas predsjedavajućeg, odnosno zamjenika predsjedavajućeg, u skladu sa stavom (3) ovog člana, je odlučujući.“*

## **Član 15.**

Član 15. mijenja se i glasi:

### **„Član 15.**

#### ***Sekretarijat, državni službenici i uposlenici Vijeća***

(1) *Stručne, finansijske i administrativne poslove Vijeća obavlja Sekretarijat Vijeća. U poslove Sekretarijata spada, između ostalog, pružanje administrativne podrške, obavljanje pravnog, finansijskog i drugog istraživanja neophodnog kako bi Vijeće ostvarivalo svoj mandat u skladu sa zakonom, kao i davanje strateških savjeta o pitanjima vezanim za izvršavanje mandata Vijeća. Sekretarijat izrađuje nacрте odluka koje donosi Vijeće, izvršava odluke koje usvaja Vijeće i redovno izvještava Vijeće o svojim aktivnostima.*

(2) *Sekretarijat Vijeća ima direktora i zamjenika direktora, koji su odgovorni Vijeću. Direktora i zamjenika direktora imenuje i razrješava Vijeće u skladu sa odredbama Zakona o državnoj službi u institucijama Bosne i Hercegovine, na mandat od četiri godine i mogu biti ponovo imenovani u skladu sa postupkom javnog konkursa. Član 34. stav (2) Zakona o državnoj službi u institucijama Bosne i Hercegovine u dijelu koji reguliše maksimalnu dužinu postavljanja na mjesto sekretara sa posebnim zadatkom se ne primjenjuje na direktora i zamjenika direktora Sekretarijata.*

(3) *Direktor je odgovoran za sveukupno obavljanje stručnih, finansijskih i administrativnih poslova Sekretarijata, za izvršenje budžeta kojeg usvaja Vijeće, kao i za ostale poslove o kojima odluči Vijeće.*

(4) *Zamjenik direktora zamjenjuje direktora u njegovom odsustvu i vrši poslove koje mu dodjeli direktor Sekretarijata.*

(5) *Direktor i zamjenik direktora imaju pravo da prisustvuju svim sjednicama Vijeća kao učesnici bez prava glasa i iznesu svoje mišljenje o svim tačkama dnevnog reda. Direktor i zamjenik direktora također mogu predlagati i stavljati tačke na dnevni red.*

(6) *U skladu sa odredbama Zakona o državnoj službi u institucijama Bosne i Hercegovine, državne službenike u Vijeću imenuje i razrješava predsjednik Vijeća.*

(7) *U skladu sa zakonima Bosne i Hercegovine iz oblasti radnih odnosa, odluku o prijemu u radni odnos i otkazu ugovora o radu od strane poslodavca za uposlenike Vijeća koji nemaju status državnih službenika donosi:*

- a) direktor za uposlenike u Sekretarijatu,*
- b) glavni disciplinski tužilac za uposlenike u Uredu disciplinskog tužioca.*

(8) *Član 19. stav 2. Zakona o državnoj službi u institucijama Bosne i Hercegovine ne primjenjuje se na popunjavanje upražnjenih mjesta u Vijeću. Sva imenovanja u Vijeće regulišu se članom 28. stav 2. Zakona o državnoj službi u institucijama Bosne i Hercegovine, dok član 51. stav 2. tog zakona reguliše razrješavanje uposlenika Vijeća.*

(9) *Za članove komisije za izbor iz člana 24. stav 2. Zakona o državnoj službi ispred Vijeća biraju se dva člana i to:*

- a) dva člana Vijeća koja Vijeće izabere, za izbor direktora Sekretarijata, zamjenika direktora Sekretarijata i glavnog disciplinskog tužioca.*

- b) član Vijeća kojeg Vijeće izabere i direktor odnosno osoba koju on ovlasti, za izbor državnih službenika u Sekretarijatu.
- c) član Vijeća kojeg Vijeće izabere i glavni disciplinski tužilac odnosno osoba koju on ovlasti, za izbor državnih službenika u Uredu disciplinskog tužioca.

(10) Na prijedlog direktora, Vijeće odlučuje o prirodi i sadržaju javnog konkursa koji se provodi u skladu sa članom 26. stav (1) Zakona o državnoj službi u institucijama Bosne i Hercegovine.

(11) Vijeće može primati sredstva od međunarodnih donatora za operativni budžet Vijeća, kao i za posebne projekte reforme pravosuđa izvan operativnog budžeta Vijeća. Ta sredstva se uplaćuju na poseban račun otvoren kod Centralne banke Bosne i Hercegovine. Sredstva se troše po nalogu direktora Sekretarijata, u skladu s propisima o izvršenju donatorskih sredstava koje donosi Vijeće i u skladu sa uslovima ugovora o donacijama potpisanim sa donatorom.

(12) Za realizaciju projekata reforme pravosuđa koje finansiraju donatori i čije su aktivnosti privremenog karaktera Vijeće može zapošljavati lica po osnovu ugovora o radu na određeno vrijeme, pri čemu je trajanje ugovora o radu ograničeno trajanjem projekta, a najduže na period od četiri godine. Odredbe Zakona o radu u institucijama Bosne i Hercegovine kojima su propisana ograničenja u pogledu dužine trajanja ugovora o radu na određeno vrijeme se ne primjenjuju na lica uposlena u skladu sa ovim članom.“

### **Član 17a.**

Iza člana 17. dodaje se novi član 17a. koji glasi:

#### **„Član 17a.**

*(Odlučivanje Sudskog i Tužilačkog odjela)*

(1) Odluke iz člana 17. tač (1), (3), (11), (12) i (13) te odluke iz čl. 44. stav (3), 46. stav (2), 48. stav (4), 53a. st. (5), (9) i (14), 81. stav (1), 88. izuzev stava (1) tačka f) i 89. koje se odnose na sudije, uključujući predsjednike sudova, dodatne sudije i sudije porotnike, te stručne saradnike, više stručne saradnike i stručne savjetnike u sudovima, donosi Sudski odjel Vijeća.

(2) Odluke iz člana 17. tač (2), (11), (12) i (13) te odluke iz čl. 44. stav (3), 46. stav (2), 53a. st. (8), (9) i (14), 81. stav (2), 88. izuzev stava (1) tačka f) i 89. koje se odnose na tužioce, uključujući i glavne tužioce i zamjenike glavnog tužioca, te stručne saradnike u tužilaštvima, donosi Tužilački odjel Vijeća.,,

### **Član 18.**

Član 18. mijenja se i glasi:

#### **„Član 18.**

**Sudovi i tužilaštva**

(1) Vijeće ima zakonom utvrđene nadležnosti u odnosu na sudove i tužilaštva u Bosni i Hercegovini izuzev Ustavnog suda Bosne i Hercegovine.

*(2) U odnosu na Ustavni sud Federacije Bosne i Hercegovine i Ustavni sud Republike Srpske Vijeće ima nadležnosti isključivo u skladu sa odredbama člana 17. tačka 3. ovog zakona.“*

#### **Član 20.**

U članu 20. stav (1) i (2) mijenjaju se i glase:

*„(1) Vijeće, u skladu s odredbama Zakona o finansiranju institucija Bosne i Hercegovine priprema nacrt svog godišnjeg budžeta i dostavlja ga nadležnoj parlamentarnoj komisiji Parlamentarne skupštine Bosne i Hercegovine na odobravanje.*

*(2) Vijeće, nakon dobivanja odobrenja nadležne parlamentarne komisije, prema rokovima iz Zakona o finansiranju institucija Bosne i Hercegovine, dostavlja Ministarstvu finansija i trezora Bosne i Hercegovine nacrt svog budžeta radi uvrštavanja u Budžet institucija Bosne i Hercegovine.“*

Iza stava (2) dodaju se novi stavovi (3) i (4) koji glase:

*„(3) Ministarstvo finansija i trezora Bosne i Hercegovine, Vijeće ministara i Predsjedništvo Bosne i Hercegovine mogu dati mišljenje o nacrtu budžeta Vijeća, bez mogućnosti izmjene nacrta budžeta koji je prethodno odobrila nadležna parlamentarna komisija Parlamentarne skupštine Bosne i Hercegovine.*

*(4) Vijeće odobrava zahtjeve za plaćanje troškova Vijeća i dostavlja ih Ministarstvu finansija i trezora Bosne i Hercegovine na realizaciju.“*

Dosadašnji stavovi (3) i (4) postaju stavovi (5) i (6).

#### **Član 21.**

U članu 21. iza tačke (e) dodaje se nova tačka (f) koja glasi:

*„(a) da se protiv nje ne vodi krivični postupak.“*

#### **Član 23a.**

Iza člana 23. dodaje se novi član 23a. koji glasi:

#### **„Član 23a. Apelacioni sud Bosne i Hercegovine**

*(1) Sudije Apelacionog suda Bosne i Hercegovine moraju imati najmanje osam godina iskustva u radu kao sudije, tužioci, advokati ili drugo relevantno pravno iskustvo, nakon položenog pravosudnog ispita, i imenuju se doživotno, s tim što im mandat može prestati u slučaju da podnesu ostavku, navrše starosnu dob propisanu za obavezan odlazak u penziju ili budu smijenjeni s funkcije iz razloga utvrđenih zakonom.*

*(2) Predsjednik Apelacionog suda Bosne i Hercegovine je jedan od sudija imenovanih u Apelacioni sud Bosne i Hercegovine, koji ima dokazane rukovodne i organizacijske sposobnosti bitne za rad tog suda. Predsjednik se imenuje na mandat od šest godina i može biti ponovno imenovan.“*



### **Član 28a.**

Iza člana 28. dodaje se novi član 28a. koji glasi:

#### **„Član 28a. Privredni sudovi**

(1) *Sudije Višeg privrednog suda u Republici Srpskoj moraju imati najmanje pet godina iskustva u radu kao sudije, tužioci, advokati ili drugo relevantno pravno iskustvo, nakon položenog pravosudnog ispita. Sudije se imenuju na mandat neograničenog trajanja, s tim što im mandat može prestati u slučaju da podnesu ostavku, navrše starosnu dob propisanu za obavezan odlazak u penziju ili budu razriješeni dužnosti iz razloga utvrđenih zakonom.*

(2) *Predsjednik Višeg privrednog suda u Republici Srpskoj je jedan od sudija imenovanih u taj sud, koji ima dokazane rukovodne i organizacijske sposobnosti bitne za rad tog suda. Predsjednik se imenuje na mandat od šest godina i može biti ponovo imenovan.*

(3) *Sudije okružnih privrednih sudova u Republici Srpskoj moraju imati najmanje tri godine iskustva u radu na pravnim poslovima, nakon položenog pravosudnog ispita. Sudije se imenuju na mandat neograničenog trajanja s tim što im mandat može prestati u slučaju da podnesu ostavku, navrše starosnu dob propisanu za obavezan odlazak u penziju ili budu razriješeni dužnosti iz razloga utvrđenih zakonom.*

(4) *Predsjednik okružnog privrednog suda je jedan od sudija imenovanih u taj sud, koji ima dokazane rukovodne i organizacijske sposobnosti bitne za rad tog suda. Predsjednik se imenuje na mandat od četiri godine i može biti ponovo imenovan.,,*

### **Član 34a.**

Iza člana 34. dodaje se novi član 34a. koji glasi:

#### **Član 34a.**

*(Stručni saradnici, viši stručni saradnici i stručni savjetnici)*

(1) *Sve nadležnosti koje Vijeće ima u odnosu na sudije i tužioce odnose se i na stručne saradnike, više stručne saradnike i stručne savjetnike u sudovima i tužilaštvima.*

(2) *Ukoliko nije drugačije propisano, odredbe ovog zakona koje se odnose na sudije i tužioce primjenjivat će se i na stručne saradnike, više stručne saradnike i stručne savjetnike u sudovima i tužilaštvima.*

(3) *Za stručnog saradnika u općinskom odnosno osnovnom sudu, okružnom privrednom sudu, kao i Sudu Bosne i Hercegovine, te kantonalnom odnosno okružnom tužilaštvu, Tužilaštvu Brčko distrikta Bosne i Hercegovine kao i Tužilaštvu Bosne i Hercegovine može biti imenovan diplomirani pravnik sa položenim pravosudnim ispitom.*

(4) *Za višeg stručnog saradnika na kantonalnom odnosno okružnom sudu, Višem privrednom sudu i Sudu Bosne i Hercegovine može biti imenovan diplomirani pravnik sa položenim pravosudnim ispitom i tri godine radnog iskustva na pravnim poslovima.*

(5) *Za stručnog savjetnika odnosno višeg stručnog saradnika na entitetskim vrhovnim sudovima, Apelacionom sudu Brčko distrikta Bosne i Hercegovine i Apelacionom sudu Bosne*

*i Hercegovine može biti imenovan diplomirani pravnik sa položenim pravosudnim ispitom i pet godina radnog iskustva na pravnim poslovima.*

*(6) Za stručnog saradnika u Federalnom tužilaštvu Federacije Bosne i Hercegovine i Republičkom tužilaštvu Republike Srpske može biti imenovan diplomirani pravnik sa položenim pravosudnim ispitom i 5 godina radnog iskustva na pravnim poslovima.*

*(7) Da bi osoba bila imenovana na mjesto stručnog saradnika, višeg stručnog saradnika odnosno stručnog savjetnika, mora ispunjavati i uslove iz člana 21. ovog zakona*

*(8) Stručni saradnik u općinskom odnosno osnovnom sudu, okružnom privrednom sudu, kantonalnom odnosno okružnom tužilaštvu i Tužilaštvu Brčko distrikta Bosne i Hercegovine imenuje se na mandat od 6 godina i može biti ponovo imenovan.*

*(9) Ovlaštenja stručnog saradnika, višeg stručnog saradnika i stručnog savjetnika utvrđuju se zakonom.*

*(10) Odredbe ovog zakona ne odnose se na ostale službenike odnosno radnike suda i tužilaštva, uključujući i državne službenike i namještenike.“*

### **Član 36.**

U članu 36. dodaju se novi stavovi (2), (3) i (4) koji glase:

*„(2) Ukoliko je za upražnjena mjesta u jednom sudu ili tužilaštvu objavljen konkurs u periodu od 24 mjeseca, Vijeće može na pozicije koje su u tom sudu odnosno tužilaštvu u međuvremenu postale upražnjene imenovati kandidata sa prethodne liste uspješnih kandidata za taj sud ili tužilaštvo.*

*(3) Postupak imenovanja u skladu sa stavom (2) ovog člana detaljnije se reguliše Poslovníkom Vijeća.*

*(4) Odredbe stava (2) ovog člana se ne odnose na pozicije predsjednika suda, glavnog tužioca i zamjenika glavnog tužioca.“*

### **Član 37.**

Član 37. mijenja se i glasi:

#### **„Član 37.**

***Podvijeća za predlaganje kandidata za imenovanje na nivou Bosne i Hercegovine i u Brčko Distriktu Bosne i Hercegovine***

*(1) Vijeće ima podvijeća za predlaganje kandidata za upražnjena mjesta u sudovima i tužilaštvima na nivou Bosne i Hercegovine i u Brčko distriktu Bosne i Hercegovine.*

*(2) Podvijeće za predlaganje kandidata za sudijska mjesta na nivou Bosne i Hercegovine i u Brčko distriktu Bosne i Hercegovine čini šest članova Vijeća i to:*

*a) član Vijeća koji je sudija Apelacionog suda Bosne i Hercegovine ili Suda Bosne i Hercegovine*

- b) član Vijeća koji je sudija Apelacionog suda Brčko distrikta Bosne i Hercegovine ili Osnovnog suda Brčko distrikta Bosne i Hercegovine,
- c) član Vijeća koji je izabran od strane Parlamentarne skupštine Bosne i Hercegovine,
- d) član Vijeća koji je izabran od strane Predsjedništva Bosne i Hercegovine;
- e) član Vijeća koji je sudija Vrhovnog suda Republike Srpske,
- f) član Vijeća koji je sudija Vrhovnog suda Federacije Bosne i Hercegovine.

(3) Podvijeće za predlaganje kandidata za tužilačka mjesta na nivou Bosne i Hercegovine i u Brčko distriktu Bosne i Hercegovine čini šest članova Vijeća i to:

- a) član Vijeća koji je tužilac Tužilaštva Bosne i Hercegovine
- b) član Vijeća koji je tužilac Tužilaštva Brčko distrikta Bosne i Hercegovine,
- c) član Vijeća koji je izabran od strane Parlamentarne skupštine Bosne i Hercegovine,
- d) član Vijeća koji je izabran od strane Predsjedništva Bosne i Hercegovine;
- e) član Vijeća koji je tužilac Federalnog tužilaštva Federacije Bosne i Hercegovine,
- f) član Vijeća koji je tužilac Republičkog tužilaštva Republike Srpske.“

### **Član 38.**

Član 38. mijenja se i glasi:

#### **„Član 38.**

#### **Podvijeće za predlaganje kandidata za imenovanje u entitetima**

(1) Vijeće ima podvijeća za predlaganje kandidata za imenovanja na sudijska i tužilačka mjesta u entitetima.

(2) Podvijeće za predlaganje kandidata za sudijska mjesta u Republici Srpskoj čine četiri člana Vijeća iz Republike Srpske i to:

- a) član Vijeća koji je sudija Vrhovnog suda Republike Srpske;
- b) član Vijeća koji je sudija okružnog suda ili Višeg privrednog suda;
- c) član Vijeća koji je sudija osnovnog suda ili okružnog privrednog suda;
- d) član Vijeća koji je izabran od strane Narodne skupštine Republike Srpske.

(3) Podvijeće za predlaganje kandidata za tužilačka mjesta u Republici Srpskoj čine četiri člana Vijeća iz Republike Srpske i to:

- a) član Vijeća koji je tužilac Republičkog tužilaštva Republike Srpske;
- b) dva člana Vijeća koji su tužioci okružnog tužilaštva iz Republike Srpske;
- c) član Vijeća koji je izabran od strane Narodne skupštine Republike Srpske.

(4) Podvijeće za predlaganje kandidata za sudijska mjesta u Federaciji Bosne i Hercegovine čine četiri člana Vijeća iz Federacije Bosne i Hercegovine i to:

- a) član Vijeća koji je sudija Vrhovnog suda Federacije Bosne i Hercegovine;
- b) član Vijeća koji je sudija kantonalnog suda;
- c) član Vijeća koji je sudija općinskog suda;
- d) član Vijeća koji je izabran od strane Parlamenta Federacije Bosne i Hercegovine.

(5) Podvijeće za predlaganje kandidata za tužilačka mjesta u Federaciji Bosne i Hercegovine čine četiri člana Vijeća iz Federacije Bosne i Hercegovine i to:

- a) član Vijeća koji je tužilac Federalnog tužilaštva Federacije Bosne i Hercegovine;
- b) dva člana Vijeća koji su tužioci kantonalnog tužilaštva iz Federacije Bosne i Hercegovine;
- c) član Vijeća koji je izabran od strane Parlamenta Federacije Bosne i Hercegovine.“

## **Član 39.**

Član 39. mijenja se i glasi:

### **„Član 39.**

#### ***Kvalifikaciono pismeno testiranje***

(1) *Kvalifikaciono pismeno testiranje kandidata vrši se za pozicije stručnih saradnika, viših stručnih saradnika i stručnih savjetnika, kao i za prvo imenovanje na poziciju sudije odnosno tužioca na bilo kojem nivou.*

(2) *Testiranjem se provjerava stručnost kandidata u skladu sa kriterijima iz člana 43. ovog zakona, a može obuhvatiti sljedeće oblasti:*

- (a) *Ustavno pravo Bosne i Hercegovine;*
- (b) *Krivično pravo;*
- (c) *Krivično procesno pravo;*
- (d) *Građansko pravo;*
- (e) *Građansko procesno pravo;*
- (f) *Upravno pravo i upravno procesno pravo;*
- (g) *Privredno pravo;*
- (h) *Evropska konvencija za zaštitu ljudskih prava i temeljnih sloboda i drugi međunarodni dokumenti, ugovori i sporazumi o ljudskim pravima čija je potpisnica Bosna i Hercegovina;*
- (i) *Etički principi za obavljanje sudijske ili tužilačke dužnosti; i*
- (j) *Druga pitanja bitna za dužnost.*

(3) *Kvalifikaciono pismeno testiranje se vrši pod šifrom i osobe koje ocjenjuju kvalifikacione pismene testove, tokom procesa ocjenjivanja ne mogu znati identitet osobe koja je radila test.*

(4) *U slučaju iz stava (1) ovog člana na kvalifikaciono pismeno testiranje pozivaju se osobe koje ispunjavaju osnovne i posebne uslove propisane ovim zakonom za imenovanje na poziciju na koju se prijavljuju.*

(5) *Kandidat koji je ranije pristupio kvalifikacionom pismenom testiranju neće se pozivati na ponovno testiranje prije isteka roka kojeg utvrdi Vijeće Poslovnikom i u tom slučaju u obzir će se uzeti ranije ostvareni uspjeh.*

(6) *Kandidat čija prijava nije uzeta u razmatranje ili je odbačena, odnosno kandidat koji nije pozvan na kvalifikaciono testiranje može uložiti žalbu Predsjedništvu Vijeća u roku od tri dana od dana prijema obavijesti o odbacivanju prijave.“*

## **Član 40.**

Član 40. mijenja se i glasi:

### **„Član 40.**

#### ***Razgovor sa kandidatima***

(1) *Nijedna osoba ne može se imenovati na dužnost sudije ili tužioca ukoliko s njom nije obavljen razgovor.*

(2) Na razgovor se pozivaju kandidati koji su na kvalifikacionom pismenom testiranju ostvarili odgovarajući uspjeh, koji je utvrđen Poslovníkom Vijeća, odnosno kandidati koji ispunjavaju osnovne i posebne uslove propisane ovim zakonom za imenovanje na poziciju na koju se prijavljuju, a koji nisu bili u obavezi polagati kvalifikacioni pismeni test.

(3) Kandidat s kojim je prethodno u posljednja 24 mjeseca obavljen razgovor za poziciju istog nivoa neće se ponovo pozivati na razgovor i u tom slučaju u obzir će se uzeti ranije ostvaren uspjeh.

(4) Podvijeća za predlaganje kandidata iz čl. 37. i 38. ovog zakona, u skladu sa Poslovníkom Vijeća, imenuju komisije od najmanje tri, a najviše pet članova Vijeća, koje obavljaju razgovore s kandidatima i boduju uspjeh kandidata na razgovoru.

(5) Na razgovoru sa kandidatima koji su polagali kvalifikacioni pismeni test komisija utvrđuje motiviranost kandidata za rad u pravosuđu na poziciji za koju se prijavio, sposobnost kandidata da odgovorno, nezavisno i nepristrasno obavlja funkciju za koju se prijavio, razumijevanje značaja sudske odnosno tužilačke etike, komunikativnost i sposobnost prezentiranja, analitičke sposobnosti i sposobnost za rješavanje pravnih problema.

(6) Na razgovoru sa kandidatima koji nisu bili u obavezi polagati kvalifikacioni pismeni test komisija pored okolnosti iz stava (5) ovog člana utvrđuje sposobnost kandidata u smislu praćenja sudske prakse i izmjena u zakonodavstvu.

(7) U toku obavljanja razgovora i kvalifikacionog pismenog testiranja sa kandidatima u pravilu se vrši audio-vizuelno snimanje. Audio-vizuelni zapis obavljenog razgovora dostupan je isključivo tijelu nadležnom za odlučivanje po žalbi u postupku imenovanja.“

#### **Član 41.**

U članu 41. u stavu (1) iza riječi „mišljenja“ dodaju se riječi „i informacije“.

Iza stava (1) dodaju se novi stavovi (2) i (3) koji glase:

„(2) Vijeće pribavlja informacije neophodne za ocjenu stručnih sposobnosti kandidata propisanih u članu 22. ovog zakona kao što su podaci o krivičnim osudama, uključujući i osude koje su brisane iz kaznene evidencije, podatke o izrečenim disciplinskim mjerama odnosno povredama službene dužnosti kao i druge relevantne informacije.

(3) Kandidat je u postupku javnog konkursa dužan navesti podatke o okolnostima iz prethodnog stava.“

#### **Član 43.**

Član 43. mijenja se i glasi:

#### **„Član 43. Kriteriji**

(1) Kriteriji za prvo imenovanje na poziciju sudije odnosno tužioca su:

- (a) Stručna sposobnost za obavljanje pravosudne funkcije što se utvrđuje na temelju rezultata kvalifikacionog pismenog testiranja;
- (b) Rezultati obavljenog razgovora;

(c) *Stručne kvalifikacije pokazane kroz stručno usavršavanje, objavljivanje naučnih radova i druge aktivnosti u struci.*

(2) *Prvim imenovanjem smatra se imenovanje na poziciju sudije odnosno tužioca osobe koja u trenutku imenovanja nije sudija ili tužilac, niti je u periodu od tri godine do objavljivanja konkursa bila sudija odnosno tužilac.*

(3) *Na kandidata koji već obavlja funkciju sudije, a prijavi se na upražnjenu poziciju u sudu višeg nivoa, odnosno na kandidata koji već obavlja funkciju tužioca, a prijavi se na poziciju u tužilaštvu višeg nivoa primjenjuju se sljedeći kriteriji:*

- (a) *Stručna sposobnost za obavljanje pravosudne funkcije što se utvrđuje na osnovu dosadašnjeg rada i radnih rezultata kao i dužine radnog iskustva u pravosuđu;*
- (b) *Rezultati obavljenog razgovora;*
- (c) *Stručne kvalifikacije pokazane kroz stručno usavršavanje, objavljivanje naučnih radova i druge aktivnosti u struci.*

(4) *Kriteriji iz stava (3) ovog člana primjenjuju se i na:*

- (a) *kandidate koji već obavljaju funkciju sudije ili tužioca, a koji se prijave na istu poziciju u sudu odnosno tužilaštvu istog nivoa,*
- (b) *kandidate koji obavljaju funkciju sudije, a prijave se na upražnjenu poziciju tužioca u tužilaštvu bilo kojeg nivoa,*
- (c) *kandidate koji obavljaju funkciju tužioca, a prijave se na poziciju sudije u sudu bilo kojeg nivoa,*
- (d) *kandidate koji su obavljali funkciju sudije ili tužioca u periodu od tri godine do objavljivanja konkursa za poziciju za koju su se prijavili.“*

(5) *Na kandidate koji se prijave na poziciju predsjednika suda, glavnog tužioca odnosno zamjenika glavnog tužioca, a koji već obavljaju rukovodeću funkciju u pravosuđu primjenjuju se sljedeći kriteriji:*

- (a) *Stručna sposobnost za obavljanje rukovodećih poslova što se utvrđuje na temelju sljedećih podkriterija:*
  - 1) *Radni rezultati na poziciji predsjednika suda, glavnog tužioca i zamjenika glavnog tužioca;*
  - 2) *Rezultati rada suda odnosno tužilaštva u kojem kandidat obavlja rukovodeću poziciju;*
  - 3) *Reputacija i ugled kandidata u pravosudnoj zajednici.*
- (b) *Rezultati obavljenog razgovora.*

(6) *Na kandidate koji se prijave na poziciju predsjednika suda, glavnog tužioca odnosno zamjenika glavnog tužioca, a koji ne obavljaju rukovodeću funkciju u pravosuđu primjenjivat će se kriteriji iz stava (1) ili stava (3) ovog člana uz sljedeći dodatni kriterij:*

- (a) *Sposobnost za obavljanje rukovodećih poslova što se utvrđuje na temelju sljedećih podkriterija:*
  - 1) *Poznavanje poslova sudske odnosno tužilačke uprave;*
  - 2) *Organizacione sposobnosti;*
  - 3) *Stručno usavršavanje u oblasti rukovođenja;*
  - 4) *Reputacija i ugled kandidata u profesionalnoj zajednici iz koje dolazi.*

### **Član 43a.**

Iza člana 43. dodaje se novi član 43a. koji glasi:

#### **„Član 43a. Bodovanje kandidata**

(1) Način ocjenjivanja kvalifikacionog pismenog testiranja, te obavljenog razgovora kao i način bodovanja kandidata u skladu sa kriterijima iz člana 43. detaljnije se reguliše Poslovníkom Vijeća pri čemu će se utvrditi minimalan uspjeh koji kandidat mora ostvariti da bi bio imenovan, odnosno da bi se plasirao na listu uspješnih kandidata.

(2) Poslovníkom će se propisati i maksimalan broj bodova koji se može dodijeliti po svakom od kriterija iz člana 43. pri čemu broj bodova za kriteriji stručne sposobnosti čini najmanje 80% od ukupnog broja bodova.

(3) Bodovanje i rangiranje kandidata vrši nadležno podvijeće na temelju rezultata kvalifikacionog pismenog testiranja, obavljenog razgovora te uvida u dokumentaciju.

(4) Prilikom predlaganja kandidata odnosno donošenja odluke o imenovanju pored ostvarenih bodova na temelju kriterija iz člana 43. u obzir će se uzeti i sve okolnosti koje su relevantne u smislu člana 22. ovog zakona poput podataka o ranijim disciplinskim prekršajima, ranijim krivičnim osudama, kao i druge slične okolnosti koje bi kandidata mogle učiniti nepodobnim za sudijsku odnosno tužilačku funkciju.

(5) Lista kandidata sa ostvarenim ocjenama odnosno bodovima, uključujući i kandidate koji nisu ostvarili zadovoljavajući uspjeh, objavljuje se na zaštićenom dijelu internet stranice Vijeća i dostupna je samo kandidatima koji su učestvovali u konkursnoj proceduri.“

### **Član 44.**

Član 44. mijenja se i glasi:

#### **„Član 44. Odluka o imenovanju i žalba**

(1) Odluka o imenovanju kandidata sa liste uspješnih kandidata na prijedlog nadležnog podvijeća donosi se u skladu sa čl. 17. i 17a. ovog zakona i sadrži obrazloženje u pismenoj formi.

(2) Vijeće primjenjuje odgovarajuće ustavne odredbe kojim se uređuju jednaka prava i zastupljenost konstitutivnih naroda i ostalih. Imenovanja na svim nivoima pravosuđa također treba da imaju za cilj i postizanje jednakosti spolova.

(3) Vijeće može poništiti odluku o imenovanju ako nakon donošenja odluke o imenovanju, a prije nego što imenovani sudija ili tužilac preuzme dužnost, dobije podatke koji bi, da su bili poznati u vrijeme imenovanja, predstavljali razlog da Vijeće ne donese odluku o imenovanju. Vijeće može, ako to smatra neophodnim, odgoditi datum preuzimanja dužnosti sudije ili tužioca na koga se odnose navedeni podaci, kako bi te podatke moglo na odgovarajući način provjeriti.

(4) *Ako Vijeće poništi odluku o imenovanju, na tu će dužnost imenovati drugu osobu iz grupe prijavljenih kandidata, ili će ponovno objaviti konkurs za to upražnjeno mjesto.*

(5) *Na odluku o imenovanju može se uložiti žalba Vijeću u roku od tri dana od dana prijema odluke.*

(6) *Žalbom na odluku o imenovanju može se osporavati regularnost provedenog postupka pismenog kvalifikacionog testiranja i obavljenog razgovora, kao i postupka bodovanja kandidata.*

(7) *Odlučivanje po žalbi u skladu sa ovim članom uređuje se Poslovníkom Vijeća.*“

#### **Član 48.**

U članu 48. iza stava (2) dodaju se novi stavovi (3), (4) i (5) koji glase:

„(3) *Mandat dodatnog sudije može trajati najmanje tri, a najviše šest godina.*

(4) *Vijeće može, po službenoj dužnosti, odlučiti o produženju mandata dodatnom sudiji ukoliko su ispunjeni uslovi iz stava (1) ovog člana, pri čemu će se imati u vidu rezultati rada dodatnog sudije.*

(5) *Ukoliko, nakon isteka roka od šest godina, u sudu postoji potreba za dodatnim sudijom Vijeće će preispitati potrebu povećanja broja sudija, u skladu sa članom 17. tačka 25. ovog zakona.*“

#### **Član 53a.**

Iza člana 53. dodaje se novi član 53a. koji glasi:

#### **„Član 53a. Ocjenjivanje rezultata rada sudija**

(1) *Sudija se ocjenjuje najmanje jednom u tri godine na temelju rezultata rada, u skladu sa kriterijima koje utvrdi Vijeće.*

(2) *Tužilac se ocjenjuje najmanje jednom u tri godine na temelju rezultata rada, u skladu sa kriterijima koje utvrdi Vijeće.*

(3) *Odluku o ocjeni rada sudije donosi predsjednik suda.*

(4) *Odluku o ocjeni rada predsjednika suda donosi predsjednik neposredno višeg suda.*

(5) *Rezultate rada predsjednika Apelacionog suda Bosne i Hercegovine, Vrhovnog suda Federacije Bosne i Hercegovine, Vrhovnog suda Republike Srpske i Apelacionog suda Brčko distrikta Bosne i Hercegovine ocjenjuje Sudski odjel.*

(6) *Odluku o ocjeni rada tužilaca, uključujući i zamjenika glavnog tužioca, donosi glavni tužilac.*



(7) Rezultate rada glavnog kantonalnog odnosno okružnog tužioca ocjenjuje glavni entitetski tužilac.

(8) Rezultate rada glavnog tužioca Tužilaštva Bosne i Hercegovine, Federalnog tužilaštva Federacije Bosne i Hercegovine, Republičkog tužilaštva Republike Srpske i Tužilaštva Brčko distrikta Bosne i Hercegovine ocjenjuje Tužilački odjel.

(9) Na odluku o ocjeni rada sudija odnosno tužilac može izjaviti žalbu Sudskom odnosno Tužilačkom odjelu. Odluka Sudskog odnosno Tužilačkog odjela po žalbi je konačna i na istu se ne mogu izjavljivati pravni lijekovi.

(10) Na odluku o ocjeni rada predsjednik suda iz stava (5) ovog člana odnosno glavni tužilac iz stava (8) ovog člana može izjaviti žalbu Vijeću. Odluka Vijeća po žalbi je konačna i na istu se ne mogu izjavljivati pravni lijekovi.

(11) Ocjene rada nosilaca pravosudnih funkcija Vijeće uzima u obzir prilikom imenovanja na više pozicije, produživanja mandata dodatnih sudija i prilikom utvrđivanje disciplinske odgovornosti posebno za disciplinski prekršaj iz člana 56. tačka 8. i 57. tačka 8.

(12) Predsjedniku suda koji je ocijenjen jednom od dvije najniže ocjene rada u skladu sa kriterijima koje utvrdi Vijeće, prestaje mandat predsjednika suda.

(13) Glavnom tužiocu i zamjeniku glavnog tužioca koji je ocijenjen jednom od dvije najniže ocjene rada u skladu sa kriterijima koje utvrdi Vijeće, prestaje mandat glavnog tužioca odnosno zamjenika glavnog tužioca.

(14) U slučajevima iz st. (12) i (13) ovog člana Sudski odnosno Tužilački odjel donosi odluku o premještanju sa funkcije predsjednika suda odnosno glavnog tužioca ili zamjenika glavnog tužioca na poziciju sudije odnosno tužioca.

(15) U skladu sa članom 17. tačka 22. ovog zakona, Vijeće će Kriterijima za ocjenjivanje rada nosilaca pravosudnih funkcija u Bosni i Hercegovini regulisati sva pitanja koja nisu regulisana ovim zakonom u vezi sa ocjenjivanjem, uključujući i postupak ocjenjivanja i odlučivanje po žalbi na ocjenu rada.“

## **Član 55.**

**Član 55. mijenja se i glasi:**

### **„Član 55.**

#### **Nadležnost za vođenje disciplinskih postupaka**

(1) Vijeće preko svojih disciplinskih organa vrši svoje ovlasti u disciplinskom postupku.

(2) Disciplinski postupak vode:  
a) Prvostepena disciplinska komisija i  
b) Drugostepena disciplinska komisija.

(3) Prvostepena i Drugostepena disciplinska komisija su nezavisne i nadležne za rješavanje disciplinskih stvari. Član komisije koji je učestvovao u rješavanju nekog predmeta

*u Prvostepenoj komisiji ne može postupati u istoj stvari u Drugostepenoj disciplinskoj komisiji.*

*(4) Prvostepena disciplinska komisija sastavljena je od tri člana, od kojih je jedan član Vijeća, a dva člana se imenuju sa liste iz člana 61. ovog zakona.*

*(5) Drugostepena disciplinska komisija sastavljena je od tri člana od kojih je jedan član Vijeća, a dva člana se imenuju sa liste iz člana 61. ovog zakona.*

*(6) U disciplinskim postupcima koji se vode protiv sudija, većina članova komisije će, i u prvom i u drugom stepenu, biti sudije. U disciplinskim postupcima koji se vode protiv tužilaca, većina članova komisije će, i u prvom i u drugom stepenu, biti tužioci.*

*(7) Najmanje jedan član disciplinske komisije, i u prvom i u drugom stepenu, je sudija suda istog ili višeg nivoa kao i sudija protiv kojeg se postupak vodi. Najmanje jedan član disciplinske komisije, i u prvom i u drugom stepenu, je tužilac istog ili višeg nivoa kao i tužilac protiv kojeg se postupak vodi.*

*(8) Članovi disciplinskih komisija koji nisu članovi Vijeća ostvaruju pravo na naknadu u skladu sa članom 13. ovog zakona.*

*(9) Članovi Vijeća izabrani u skladu sa članom 4. stav (4) ne mogu biti birani za člana disciplinske komisije.“*

#### **Član 56.**

U članu 56. tačka 14. iza riječi „osuda“ brišu se riječi „na kaznu zatvora zbog izvršenog krivičnog djela, ili ako je proglašen krivim“.

#### **Član 57.**

U članu 57. tačka 13. iza riječi „osuda“ brišu se riječi „na kaznu zatvora zbog izvršenog krivičnog djela, ili ako je proglašen krivim“.

#### **Član 60.**

Član 60. mijenja se i glasi:

#### **„Član 60.**

#### ***Vođenje disciplinskog postupka i žalbe***

*(1) Provođenje disciplinskog postupka reguliše se Pravilnikom o disciplinskoj odgovornosti nosilaca pravosudne funkcije (u daljem tekstu: Pravilnik o disciplinskoj odgovornosti), u skladu sa ovim zakonom.*

*(2) U svim pitanjima koja se odnose na disciplinski postupak, a koja nisu obuhvaćena ovim zakonom i Pravilnikom o disciplinskoj odgovornosti shodno se primjenjuju odredbe Zakona o krivičnom postupku Bosne i Hercegovine.*

*(3) Prvostepena komisija u prvom stepenu utvrđuje disciplinsku odgovornost i izriče mjere.*

(4) Drugostepena komisija odlučuje o žalbama na odluke Prvostepene disciplinske komisije. U postupku po žalbi Drugostepena disciplinska komisija može potvrditi, ukinuti ili preinačiti odluku ili disciplinske mjere koje je izrekla Prvostepena disciplinska komisija.

(5) Na odluku Drugostepene disciplinske komisije kojom se izriče mjera razrješenja može se uložiti žalba Vijeću kao cjelini. Članovi Prvostepene i Drugostepene disciplinske komisije nemaju pravo da učestvuju u postupanju Vijeća kao cjeline.

(6) Izvršenje odluka donesenih u disciplinskom postupku i izrečenih disciplinskih mjera regulisat će se Pravilnikom o disciplinskoj odgovornosti.“

#### **Član 61.**

Član 61. mijenja se i glasi:

#### **„Član 61.**

#### ***Imenovanje i mandat članova disciplinskih komisija***

(1) Svaki sud i tužilaštvo, na općoj sjednici odnosno kolegiju, predlaže po jednog sudiju odnosno tužioca koji može biti imenovan za člana disciplinske komisije.

(2) Listu sudija i tužilaca koji mogu biti imenovani za članove disciplinskih komisija utvrđuje Vijeće na temelju prijedloga dostavljenih od strane sudova i tužilaštava.

(3) Prvostepene i drugostepene disciplinske komisije imenuje Vijeće na mandat od četiri godine.

(4) Dodjela disciplinskih predmeta u rad disciplinskim komisijama vrši se po redoslijedu koji je unaprijed utvrđen odlukom Vijeća. Vijeće može uvesti automatizovani sistem dodjele predmeta u rad disciplinskim komisijama.“

#### **Član 62. se briše.**

#### **Član 63. se briše.**

#### **Član 64.**

U članu 64. stav (1) riječi „Poslovníkom o radu Vijeća“ mijenjaju se riječima „Pravilnikom o disciplinskoj odgovornosti“.

Stav (3) mijenja se i glasi:

„(3) Za glavnog disciplinskog tužioca Ureda disciplinskog tužioca, Vijeće imenuje osobu koja ima najmanje tri godine radnog iskustva na pravnim poslovima, nakon položenog pravosudnog ispita, osobu visokih moralnih kvaliteta koja posjeduje potrebnu stručnost na polju prava. Pomoć u radu disciplinskog tužioca pružat će tužioci i istražitelji iz njegovog ureda. Glavni disciplinski tužilac može ovlastiti tužioce iz svog ureda da zastupaju predmete pred Vijećem i njegovim disciplinskim komisijama.“

U stavu (5) na kraju rečenice umjesto tačke stavlja se zarez i dodaju riječi:

„na mandat od četiri godine i može biti ponovo imenovan u skladu sa postupkom javnog konkursa. Član 34. stav (2) Zakona o državnoj službi u institucijama Bosne i Hercegovine u dijelu koji reguliše maksimalnu dužinu postavljanje na mjesto sekretara sa posebnim zadatkom se ne primjenjuje na glavnog disciplinskog tužioca.“

Stav (6) se briše. Dosadašnji stav (7) postaje stav (6).

#### **Član 67.**

Član 67. mijenja se i glasi

#### **„Član 67.**

#### ***Pokretanje disciplinskog postupka i podnošenje zahtjeva***

(1) Ured disciplinskog tužioca pokreće disciplinski postupak pred Prvostepenom disciplinskom komisijom podnošenjem zahtjeva za pokretanje disciplinskog postupka, ako smatra da je sudija ili tužilac učinio povredu dužnosti.

(2) Zahtjev za pokretanje disciplinskog postupka sadrži navodne disciplinske prekršaje i mora ispunjavati uvjete predviđene Pravilnikom o disciplinskoj odgovornosti.

(3) Na odluku o nepokretanju disciplinskog postupka podnosilac prijave može uložiti prigovor Uredu disciplinskog tužioca, što se detaljnije reguliše Pravilnikom o disciplinskoj odgovornosti.“

#### **Član 69.**

Član 69. mijenja se i glasi:

#### **„Član 69.**

#### ***Sporazum o priznanju odgovornosti***

(1) Ured disciplinskog tužioca i osoba protiv koje je podnesen zahtjev za pokretanje disciplinskog postupka mogu se, do pravosnažnog okončanja postupka, dobrovoljno sporazumjeti o disciplinskim prekršajima iz zahtjeva za pokretanje disciplinskog postupka, odnosno zaključiti sporazum o priznanju odgovornosti.

(2) Sadržaj i postupanje po sporazumu reguliše se Pravilnikom o disciplinskoj odgovornosti.

(3) Na odluku o odbijanju sporazuma žalba nije dopuštena.“

#### **Član 70.**

U članu 70. stav (1) iza riječi „podnese“ riječi „zvaničnu tužbu“ mijenjaju se riječima „zahtjev za pokretanje disciplinskog postupka“.

Iza stava (1) dodaje se novi stav (2) koji glasi:

„(2) Informacije o odluci Ureda disciplinskog tužioca o nepokretanju disciplinskog postupka u određenom predmetu, se mogu objaviti uz pristanak sudije ili tužioca na kojeg se predmet odnosi.“

U dosadašnjem stavu (2) koji postaje stav (3) iza riječi „podnošenja“ riječi „zvanične tužbe“ mijenjaju se riječima „zahtjeva za pokretanje disciplinskog postupka“.

#### **Član 72.**

U članu 72. stav (1) mijenja se i glasi:

*„Disciplinski postupak se ne može pokrenuti protiv sudije ili tužioca po isteku više od dvije godine od dana na koji je navodni prekršaj učinjen, ili u slučaju krivične stvari, po isteku više od šest mjeseci od dana pravosnažnosti odluke u krivičnom postupku.“*

Stav (2) se briše.

#### **Član 73.**

U članu 73. riječi „zvanične tužbe disciplinskoj komisiji, osim ukoliko se utvrdi razlog koji produženje ovog roka čini opravdanim.“ mijenjaju se riječima „zahtjeva za pokretanje disciplinskog postupka disciplinskoj komisiji.“

**Član 75. se briše.**

#### **Član 77.**

U članu 77. u tački (c) riječi „pokrenut postupak razrješenja“ mijenjaju se riječima „nepravomoćnom odlukom izrečena mjera razrješenja“.

Iza tačke (e) dodaje se nova tačka (f):

*„ako je protiv njega pokrenut disciplinski postupak za disciplinski prekršaj čija je priroda i težina takva da bi njegovo obavljanje pravosudne funkcije do okončanja disciplinskog postupka teško narušilo ugled pravosuđa.“*

#### **Član 79.**

U članu 79. stav (3) iza riječi „podnošenjem“ riječ „tužbe“ mijenja se riječju „žalbe“, na kraju rečenice tačka se mijenja zarezom i dodaju riječi „u roku od 15 dana od dana prijema odluke“.

Iza stava (3) dodaju se novi stavovi (4), (5) i (6) koji glase:

*„(4) Udaljeni sudija ili tužilac ima pravo na isplatu 70 % plaće za vrijeme trajanja udaljenja od vršenja dužnosti.*

*(5) U slučaju da u disciplinskom postupku ne bude utvrđena odgovornost ili da je u disciplinskom postupku izrečena disciplinska mjera iz člana 58. stav 1. tač a) – c) ovog Zakona, sudija ili tužilac ima pravo na isplatu razlike neisplaćenih plaća i drugih naknada za vrijeme trajanja posljedica odluke o udaljenju od vršenja dužnosti.*

*(6) Sudija ili tužilac protiv kojeg je obustavljena istraga ili koji je pravosnažno oslobođen u krivičnom postupku ili protiv koga je obustavljen pokrenuti krivični postupak, a zbog ovih okolnosti je udaljen sa vršenja službene dužnosti, ima pravo na isplatu razlike neisplaćenih*

plaća i drugih naknada za vrijeme trajanja posljedica odluke o udaljenju od vršenja dužnosti.“

### **Član 81.**

Član 81. mijenja se i glasi:

#### **„Član 81.**

**(Imenovanje zamjenika koji će vršiti dužnost za vrijeme privremene suspenzije)**

(1) U slučaju privremenog udaljenja predsjednika suda Vijeće će odrediti sudiju tog suda koji će vršiti dužnost predsjednika suda za vrijeme trajanja privremenog udaljenja.

(2) U slučaju privremenog udaljenja glavnog tužioca Vijeće će odrediti zamjenika glavnog tužioca, ili jednog od tužilaca tog tužilaštva u kojem nije imenovan zamjenik glavnog tužioca, da vrši dužnost glavnog tužioca za vrijeme trajanja privremenog udaljenja.“

### **Član 88.**

Član 88. mijenja se i glasi:

#### **„Član 88.**

**Prestanak mandata za vršenje dužnosti**

(1) Mandat sudije ili tužioca prestaje:

- a) kada navršši starosnu dob propisanu za obavezan odlazak u penziju;
- b) u slučaju podnošenja ostavke;
- c) u slučaju imenovanja u drugi sud odnosno tužilaštvo;
- d) zbog trajnog gubitka radne sposobnosti za vršenje dužnosti sudije ili tužioca;
- e) ako mu je pravomoćnom presudom izrečena kazna zatvora;
- f) u slučaju njegovog razrješenja od strane Vijeća kao rezultat disciplinskog postupka.

(2) Mandat predsjednika suda, glavnog tužioca ili zamjenika glavnog tužioca prestaje:

- a) u slučaju prestanka dužnosti sudije odnosno tužioca;
- b) u slučaju imenovanja u drugi sud odnosno tužilaštvo;
- c) istekom perioda na koji je imenovan;
- d) u slučaju podnošenja ostavke na mjesto predsjednika suda, glavnog tužioca ili zamjenika glavnog tužioca;
- e) u slučaju premještanja s mjesta predsjednika suda na mjesto sudije, ili s mjesta glavnog tužioca ili zamjenika glavnog tužioca na mjesto tužioca, kao rezultat disciplinskog postupka;
- f) u slučaju premještanja s mjesta predsjednika suda na mjesto sudije, ili s mjesta glavnog tužioca ili zamjenika glavnog tužioca na mjesto tužioca, kao rezultat negativne ocjene rada.
- g) preuzimanjem dužnosti člana Vijeća u punovremenom radnom angažmanu.

(3) Kada sudija ili tužilac navršši starosnu dob za obavezan odlazak u penziju, njegov mandat automatski prestaje. Sudija odnosno tužilac može zahtijevati da mu mandat prestane zbog odlaska u starosnu penziju i prije navršenja starosne dobi propisane u članu 90. ovog zakona ukoliko ostvari uslove za sticanje prava na starosnu penziju u skladu sa propisima o penzijsko-invalidskom osiguranju.

(4) Sudija ili tužilac Vijeću podnosi ostavku u pismenoj formi. Odluku o prestanku mandata u skladu sa tačkom (b) stava 1. ovog člana Sudski odnosno Tužilački odjel donosi najkasnije u roku od 30 dana od prijema ostavke. Mandat prestaje na dan donošenja odluke ili na dan koji utvrdi Sudski odnosno Tužilački odjel na prijedlog sudije odnosno tužioca koji podnosi ostavku. Ukoliko o ostavci ne bude odlučeno u roku od 30 dana smatra se da je mandat prestao istekom roka od 30 dana od dana podnošenja ostavke.

(5) Mandat sudije odnosno tužioca za vršenje dužnosti u onom sudu odnosno tužilaštvu u koje je prethodno imenovan prestaje imenovanjem na pravosudnu funkciju u drugom sudu odnosno tužilaštvu s danom preuzimanja dužnosti, pri čemu rok za preuzimanje dužnosti ne može biti duži od 60 dana od dana imenovanja.

(6) Odluku o prestanku mandata u skladu sa stavom (1) tačka d) ovog člana Sudski odnosno Tužilački odjel donosi na temelju pravomoćne odluke nadležnog organa kojom se utvrđuje gubitak sposobnosti za vršenje dužnosti. Mandat prestaje danom donošenja odluke Sudskog ili Tužilačkog odjela, najkasnije u roku od 30 dana od dana prijema odluke nadležnog organa.

(7) Mandat sudije ili tužioca u skladu sa stavom (1) tačka (e) ovog člana prestaje automatski s pravomoćnošću presude kojom je izrečena kazna zatvora. Mandat sudije ili tužioca u skladu sa stavom (1) tačka (f) ovog člana ističe na dan koji utvrdi Vijeće.

(8) Ako predsjednik suda ili glavni tužilac unaprijed zna da će doći do prestanka mandata sudije ili tužioca koji je pod njegovim nadzorom, predsjednik suda ili glavni tužilac bez odlaganja o tome obavještava Vijeće kako bi se započeo novi postupak imenovanja na buduće upražnjeno mjesto.

(9) U slučaju iz stava (2) tačka b) ovog člana mandat predsjednika suda, glavnog tužioca ili zamjenika tužioca prestaje danom preuzimanja dužnosti u drugom sudu odnosno tužilaštvu, pri čemu rok za preuzimanje dužnosti u drugom sudu odnosno tužilaštvu ne može biti duži od 60 dana od dana imenovanja.

(11) Mandat predsjednika suda, glavnog tužioca ili zamjenika glavnog tužioca u skladu sa stavom (2) tač (e) i (f) ovog člana prestaje na dan koji utvrdi Sudski odnosno Tužilački odjel, a u slučaju iz stava (2) tačka g) ovog člana s danom preuzimanja dužnosti u Vijeću.

(10) Predsjednik suda, glavni tužilac ili zamjenik glavnog tužioca može podnijeti ostavku na svoju dužnost u skladu sa članom stavom 4. ovog člana.

(11) U slučaju prestanka mandata predsjednika suda, glavnog tužioca ili zamjenika glavnog tužioca, on bez obzira na to nastavlja vršiti dužnost sudije ili tužioca u istom sudu ili tužilaštvu.,,

### **Član 89.**

U članu 89. u stavu (1) iza riječi „dužnost“ dodaju se riječi „u svojstvu vršioca dužnosti“. Na kraju rečenice tačka se mijenja zarezom i dodaju riječi „ili zamjenik glavnog tužioca, a najduže šest mjeseci.“

**Iza stava (1) dodaje se novi stav (2) koji glasi:**

*„U ostalim slučajevima prestanka mandata predsjednika suda, odnosno glavnog tužioca Vijeće će imenovati sudiju odnosno tužioca koji će vršiti dužnost predsjednika suda odnosno glavnog tužioca, sa svim pravima i obavezama, dok se ne imenuje novi predsjednik suda ili glavni tužilac.“*

**NAPOMENA:**

Zakonom o izmjenama i dopunama Zakona o Visokom sudskom i tužilačkom vijeću Bosne i Hercegovine potrebno je predvidjeti odredbu kojom će se propisati da će se po stupanju na snagu ovog zakona provesti postupak izbora članova Vijeća čije pozicije, uslijed izmjena u članu 4. Zakona, budu upražnjene.